

四念處卷第四

法十

隋天台山修禪寺智者大師說

門人章安灌頂記

第四圓教四念處者為三一大意二停心三念處大意開四門云若說若行多用非有非無門云餘法易知別圓須解一明位有高下二明法之偏圓三明斷不斷四明具不具五明通不通位高下者別教十信伏界內見思十住斷界內見思又斷界外上品塵沙十行斷中品塵沙十迴向斷下品塵沙伏無明登

初地見中道斷無明乃至等覺妙覺斷無明盡圓教初有五品弟子名外凡十信名內凡皆圓伏無明而界內見思自然而盡如火燒鐵鐵雖未融垢在前去正慧觀無明無明未除見思前盡若登初住斷一品無明乃至十住斷十品無明與別家十地齊若登初行又斷一品無明與別家等覺齊若至二行與別家妙覺齊若登三行所有智斷別人不識其名況知其法四行乃至十行十迴向十地等覺妙覺所有智斷皆非境界但知十二品斷

無明為己家之極果不知是他家之下因譬
如構塼石為基以金寶飾上豈如從基至頂
悉累金剛非唯高低有殊亦寶非寶別法說
譬說簡別朗然不須惑矣二法偏圓者類如
小乘斷通惑不除別惑聞甄迦羅彈琴迦葉
起舞天冠問曰耆年解脫何故如此迦葉答
言聲聞之惑我已斷盡此是菩薩勝妙功德
故吾於此不能自安如四方風不動須彌毗
嵐風至碎如腐草當知聲聞斷通不能知別
無漏力弱不能自安別教初心止伏見思地

前止斷界內見思登地分分伏無明分分斷
無明此則偏斷非圓伏也若作界外別說者
登地斷別見二地至六地斷別欲界思七地
斷別色無色界思此亦偏斷之義耳又作不
思議六塵義者入無量禪作無記變化色住
復入力禪捨復入力禪起復入力禪無量百
千億劫倒修凡夫事至八地已上猶是無色
界果報不可思議六塵何以得知地持解等
覺無垢地始得離見見清淨禪當知離欲界
色無色惑俱至等覺乃盡方是圓義若八地

始離無色界果報者是偏斷之義也故大經云十地為無我輪惑所轉無我只是見惑若見惑先斷不應至無垢地若見至無垢地者乃圓義耳以是推之偏斷則是別意也圓斷惑者始外內凡即圓伏三界之惑初住即圓斷無明二住至等覺皆圓斷無明以此推之圓別斷則明矣三斷不斷者別但明斷不論不斷圓具二義若教道明斷證道不斷例如小乘方便論斷證真不論斷不斷今亦如是若不思議觀內不見有煩惱可斷煩惱性不

障善提善提不障煩惱煩惱即善提善提即煩惱故淨名云佛為增上慢人說斷婬怒癡名為解脫無增上慢者婬怒癡性即是解脫無行經云婬怒即是道又云六十二見為如來種即六根六塵而無限礙法十只眼中見色亦眼中入三解脫門華嚴明十眼三乃至六根皆明於一塵中具十方三世諸佛八相成道轉法輪度衆生皆不斷而明了也四具不具者若只作一法不作一切法者此是別意若一法一切法趣一切是趣不過趣尚不可得況

有趣非趣趣一即法性法性即法界無一法
出法界外若有一法過涅槃者我亦說如幻
如化故知一法具一切法即圓意也五諸功
德通不通者若別意只一地不關餘地若圓
意一地一切諸地故大品云若聞阿字門即
解一切義過茶無字可說初阿具足四十一
字後茶亦具四十一字從初地具有住持生
長荷負義至後究竟亦具三義大論云有始
入中入終入實是一入而有初中後問若作
圓意若為判不思議二諦答偏圓俱通是世

諦相非通非塞是真諦相大意竟二五停心
者私謂五品是也即事而理其相自彰何者
初教以數息事停散動圓家以信理除疑惑
又信是道元故當初品又信是功德毋如彼
氣命又信順不動即是停心故信品是一停
心也初教以不淨事觀停貪欲圓家以讀誦
除穢染若著文字染汙法性是為染法非求
法也文字性離即是解脫解脫清淨是第二
停心也初教以慈停瞋圓以慈故有說說無
秘悋悋有秘恚則非慈相當知慈故能說第

三品停心也初教以因緣觀停癡圓以六度
度於六蔽闇去明生是第四品停心也初教
以念佛停逼迫圓以即事而理理即法佛法
佛豈逼迫佛法無能逼所逼無逼者無
逼法是第五停心當知信事即理文字即解
脫慈即寬弘度蔽彼岸一切平等是圓家五
停心也以五品為停心其義已顯又重舉四
弘四三昧生死苦諦即是涅槃無二無別此
則信事順理道元功德毋未度苦諦是初停
心煩惱即菩提無二無別是為未解集諦令

解集諦即第二讀誦解脫停心也大悲拔苦
兩誓願云未安道諦令安道諦即是以無悞
之慈而說法第三停心也未入滅諦令入滅
諦即是兼行六度度蔽彼岸第四停心也大
慈與兩誓願云又指四三昧為第五停心也
此四三昧皆修念佛破障道罪自有人歎息
覺觀不休若念佛若稱佛名即破覺觀帖然
心定故普門品云若有眾生多於貪欲常念
觀音即便得離破根本無明淨名云一念知
一切法是為坐道場皆是念佛法門也常行

出般舟諸佛倚立現前觀法界佛也常坐出
文殊問般若繫緣法界一念法界而念佛也
半行半坐出方等法華如是作已却坐思惟
諸佛實法法華云當成就四法一爲諸佛護
念云此語初心行人久行道者如安樂行常
好坐禪在於閑處修攝其心觀心無心法不
住法我心自空罪福無主作是懺悔名大懺
悔云非行非坐通四法一通衆經二通諸善
三通諸惡如賢者軍戎家業等不妨用心四
通無記行住坐卧語默皆是摩訶衍以不可

得故夫達者懸解迷者未悟如囊中有寶不
探示人人無見者今更點對真得超然前三
藏中以事緣事謂數息不淨乃至念相好等
今則不爾以理觀緣理生死即涅槃煩惱即
菩提生死是衆生之息命涅槃是法身之息
命雖不可數而可散動明寂對於數息也煩
惱是底下之穢惡菩提是尊極之淨理對前
顯後故以文字解脫對不淨停心也大悲誓
願拔因果苦若有我所尚不自出況拔他苦
若無我所以慈悲心自拔拔他對前顯後云

大慈誓願與因果樂者若十二因緣癡尚無
自樂況與他樂今自無癡故能與樂耳對前
云行四三昧皆是念佛破障道罪前教念生
身應相好今念法身相好事理永殊大異故
舉四三昧為第五停心也次修十觀成五停
者五停上求上求何等一信順不思議一實
四諦是也信一念具十法界生死即苦諦一
心具十法界煩惱即集諦集諦即菩提菩提
是道諦也生死苦諦即涅槃是滅諦也此四
非四此一非一而名實諦煩惱徧一切處一

切處皆是菩提棄此菩提更何處求菩提如
此生死苦諦徧一切處皆是涅槃棄此涅槃
更何處求涅槃畢定停心於此煩惱上求菩
提畢定停心於此生死上求涅槃信即是求
非別求也是名信一實諦成於停心也又云
何停心停心欲下化須發真正心衆生不知
生死即涅槃未度苦諦菩薩爲此而起大悲
誓今得解脫既得脫已即是今度苦諦衆生
未知煩惱即菩提菩薩爲此而起大悲今得
解脫既得脫已即是今度集諦衆生若解煩

惱即是菩提即是安於道諦衆生若解生死即是涅槃即是而得滅諦是爲菩薩下化衆生言真正者無行經云若發心求菩提是人去佛遠譬如天與地蓋指發三方便菩提心也此乃菩提心魔大經云自此之前我等皆名邪見人也若人爲說此法名善知識魔經言涅槃爲生死者指貪著界外涅槃成變易生死也經言生死即涅槃者指分段生死即大涅槃況復變易而非涅槃以真正菩提心真正化也將此下化以成停心初名上求次

名下化乘何等法向上向下所謂善修止觀生死即涅槃涅槃名止也止心心性名爲大定大涅槃深禪定窟故涅槃即是止也觀煩惱即是菩提即觀也實相之慧名一切種智一切種智名爲般若法華曰定慧力莊嚴即上求以此度衆生即是下化當知止觀是所乘之法專此止觀成於停心既能乘向上向下向上應得果向下應得度既不果不度者何物妨礙而今不獲當知破法不徧當研生死即涅槃橫破十法界鯁塞煩惱即菩提豎

破十法界鯁塞菩提涅槃道即通也不即六法那忽即六法是故須破不離六法那忽離六法是故須破不即不離菩提道通以此破法成於停心云既破法徧應與理會那猶不合當更細檢一切諸法中皆有安樂性那忽併破一切諸法皆魔羅網那忽併取須明識通塞若迷生死非涅槃十法界皆塞迷煩惱非菩提十法界亦塞達生死即涅槃十法界寂滅名之為通煩惱即菩提十法界癡如虛空不可盡老死如虛空不可盡窮無明無見

始見終名之為通如此善知識不思議險道通塞之相以成停心云既識通塞云何於坦道中修於道品若生死身不淨乃至心無常此析法四枯道品涅槃即生死指此意也若初修不淨後修於淨乃至初修無常後修於常此即四榮道品生死成涅槃此之謂也若即不淨即修非淨非不淨乃至即無常修非常非無常此是非枯非榮於其中間入般涅槃此之謂也故經言從初發心常觀涅槃行道具百句解脫名百斤金煩惱即菩提名首

楞嚴三昧修治於心猶如虛空亦名王三昧
是名善修道品以成停心也既善修道品自
能流入三解脫門未入而難起方救他而難
起皆何對治若慳蔽難起觀慳即菩提受不
受亦受亦不受乃至五不受檀即法界檀義
攝於六資生無畏法是中一二三慳即菩提
不取不捨餘蔽亦如是又對治轉治不轉兼
非等云是名助道成於停心云行人未得謂
得未證謂證增上慢起當如之何觀生死即
涅槃煩惱即菩提理涅槃也能如此解與修

多羅合文字涅槃也所觀如文文如觀觀行
涅槃也六根清淨相似涅槃也無明破佛性
理顯分真涅槃也等諸佛同大覺究竟涅槃
也當自觀察是何等位撫臆論心莫自欺欺
他是名識次位助成停心也行人行道欲熟
未熟多動內外障難每須安忍令內外障不
能動搖能忍成道事不動亦不退是心薩埵
外謂毀譽八風內謂強軟兩賊生死不能羅
煩惱不能染十法界見愛皆為侍者分段變
易二死寂然以安侍者侍者以供給役運是

名安忍以成停心也順道法愛不生者夫將
登而崩將過而墮此非小事大有所失行者
慎之莫起法愛故云涅槃即生死涅槃貪著
故生死即涅槃無退不生故於十法界法一
無所染名順愛不生而生般若般若者如人
有眼能避險從平何須傍教是名十觀成五
停心一一停心皆須十觀總有五十觀云初
品觀十法界衆生即是佛十法界五陰即是
法衆生與佛無二無別衆生陰佛陰無豪芥
之殊三世佛事衆生四儀無不具足諸波羅

蜜是名爲僧大論云衆生無上佛是法無上
涅槃是又至名僧者第一義是信順隨喜而
無疑惑是名初隨喜品將此心讀誦名第二
品能少分說名第三品兼行六度名第四品
具足六度造立僧坊四事如理乃至般若名
第五品五品成熟名觀行位一品既須十觀
四品亦如是十觀成五品如上說以想慧純
熟轉爲十信心初隨喜一實之理無二無別
轉成信心信慧分別罔罔無滯於此信中具
一切佛法如金剛寶藏無所缺減故二真正

發心度下崇上轉成念慧真正故經云百生
千生千萬億生令心正忘以正念故如來善
護念又如七覺中心沉以念起之破生死即
涅槃若心散時以念觀攝之令煩惱即菩提
是為真正發念也三善修止觀轉成精進心
者經言一心勤精進故得三菩提一切衆行
精進為本正觀明白純無間雜為精不染愛
見為進云四破法徧轉成定心涅槃即生死
菩提即煩惱是大散亂今觀十界生死即涅
槃達一切法解脫相究竟常寂滅相終歸於

空體常寂滅是名橫破生死轉成定心起染
愛煩惱煩惱即菩提是豎破十法界無礙徹
至法性轉成定心也五善知通塞轉成慧心
若起十界愚癡名為生死若起十界貪瞋名
為煩惱觀生死即涅槃煩惱即菩提菩提非
一非三是名慧心也六善修三十七品轉成
不退心若四枯道品雖不退入分段而不進
變易猶名為退今四枯道品又非禁非枯道
品出到不生不生彼岸故名不退心也七修
對治助道轉成迴向心迴生死向涅槃迴煩

惱向善提迴因向果迴事入理故言迴向心也八善識次位轉成護心若叨上濫下起增上慢即是菩薩旃陀羅今不執生死作涅槃不執煩惱作菩提又三業於涅槃無染於菩提無著是名護心也九安忍內外強轉成戒心菩薩戒具防形心若起二乘心是破戒知諸法不生無心無念不倚不著名不破戒大集云寧捨身命不求小乘名持戒心也十順道法愛不生轉成願心者菩薩發願求大涅槃不取不證大品云願求菩提不以小爲

足足即住以不足故涅槃不應住用此十心成一住十住有百名百法明門十行十向十地展轉增倍千法明門萬法明門千萬百萬不可說不可說明門故瓔珞云十信爲諸道大勝者受名名住行向地耳若復前推十信是內凡相似之位名柔順忍亦名伏忍界法十內煩惱圓融無明圓伏得六根清淨云何淨眼中取相淨塵沙無明淨乃至意根亦三種淨故不障三身三德三身三德皆與真相相似故名六根清淨廣說如法華云何六根

互清淨大品云眼中眼不可得眼中耳不可得乃至眼中鼻舌身意皆不可得是爲六根互清淨又眼中眼相不可得眼中耳相不可得乃至鼻舌身意相皆不可得是爲六根相互清淨眼中眼性不可得眼中耳性不可得乃至鼻舌身意性皆不可得是爲六根性互清淨若名不可得是俗清淨相不可得是真清淨性不可得是中清淨又名相性皆不可得是俗清淨不可得亦不可得是真清淨非俗非真不可得是中清淨但以眼爲本互淨

諸根耳鼻舌身意各各爲本各各互淨諸根互淨如上說云何六根互用於眼根中能見無量百千萬億不可說不可說不可思議不可思議虛空等世界中十法界衆生色若依若正若內若外若上若下悉見悉知是爲眼根用即於眼中聞無量百千萬億不可說不可說不可思議不可思議虛空等世界中十法界衆生若依若正兩種音聲地獄燒煮聲大論云考掠聲象馬車牛楚毒聲餓鬼求食聲脩羅鬪諍高大聲無數種人聲苦受等三

受聲乃至有頂入禪出禪聲大論云所愛時
聲比丘比丘尼讀誦音聲空無我聲菩薩解
義聲諸佛演法聲其耳明利故悉能分別知
是為眼能耳用又於眼中知無量百千億不
可說不可思虛空十法界香若依若正鐵圍
大海地中諸衆生脩羅男女大勢小輪群臣
諸宮人乃至於梵世光音及有頂比丘衆菩
薩衆在在方世尊聞香悉能知是為眼有鼻
用即於眼中知無量百千萬億不可說不可
思虛空世界中衆味法門於食等於法亦等

如純陀八斛四斗為涅槃佛事若好不好若
美不美至其舌根變成上味如天甘露無不
美者又知十法界衆生堪能法味於大衆中
出深妙聲能入其心皆令歡喜又今天龍人
神聞其所說言論次第皆樂來聽受又諸菩
薩諸佛常樂向其處說法聞皆受持又能出
深妙之音是為眼有舌用即於眼中知十法
界衆生百千萬億不可說不可思虛空等觸
身如淨明鏡衆生皆喜見其身淨故三千內
外依正山林河海皆於身中現地獄已上有

頂已還所有正報生時死時若好若醜悉於身中現二乘菩薩悉於身中現唯獨自明了餘人所不見十方三世佛從初發心中間行乃至成道轉法輪入涅槃悉於身中現佛境界既爾況復餘耶是為眼中有身用又於眼中能知百千萬億不可說不可思法十虛空等十法界所念若干種一時能悉知是為眼中有意用其聞聲知香味觸法亦有互用皆如上說當知六識所有無明所有智慧並是緣因緣因種緣因性七識所有無明所有智慧

並是了因了因種了因性八識所有無明所有智慧並是正因正因種正因性如是三種種三相三性未發名為六根清淨三種若發即真正開佛知見若小乘法門析滅諸根入空取證今大乘報身即是法界不須更滅能於諸根作此互用一根具六六六三十六法門正受清淨能此互用故淨名云或有佛土光明為佛事或佛土音聲為佛事或以香味衣服為佛事或無言寂滅為佛事皆此意也此有似有真如法華所明即相似如華嚴所

說即是真故明開不相除顯出佛菩提只言
斷而言即解脫只言不斷復云結習盡者華
不著身非斷非不斷中論斷中論不斷此
乃不思議圓融方便宜斷即斷如此土大士
度剛強衆生宜不斷即不斷如香積土聞香
即入律行也仁王云十善菩薩發大心長別
三界苦輪海十善即十信也三界苦即界內
惑圓融也大經云學大乘者雖有肉眼名爲
佛眼法華云雖未得無漏而其眼根清淨若
此此皆明相似位之文也若觀如來藏心地

法門即是觀如來眼耳鼻舌身豁然真發得
見佛性或因聞發三智現前三身具足華嚴
云初發心時便成正覺所有慧身不由他悟
得如來一身無量身湛然應一切衆生機感
即能垂應作八相成道百世界作佛或現二
乘身利益衆生法十乃至作地獄身利益衆生諸
佛加之能爲大菩薩說法此即發真之文也
三明四念處觀者先約經示大經云其後不
久王復得病醫占王病定應服乳王者八倒
衆生也其後病者初倒伏後倒起故言不久

也定服乳者應授四榮之術也正是今之念處意耳又譬有人以毒塗鼓衆中打之近者死遠者未死後打毒鼓近遠俱死初塗四枯止枯分段故言未死今塗四榮無明根斷故近遠俱死亦是今四念處意也又云如鳥出籠纔得離網今二鳥俱飛高翔遠遊去住自在正是今四念處也又云初枯生死不能照明佛法不能開悟衆生於佛法無工夫於衆生無利益故言枯雙樹今圓顯佛法大益衆生夫有心者皆當作佛八千聲聞得見佛性

如秋收冬藏成大果實故言四榮莊嚴雙樹大經不令取酒糟麥麩不與特牛同共一群不在高原亦不下濕下濕者凡邪四倒也高原者偏曲四倒也酒糟是愚癡麥麩是瞋恚特牛是貪欲選擇中原安處其子法華云正法十直捨方便但說無上道不令二乘獨得滅度十五皆以如來滅度而滅度之開示悟入佛之知見解王頂上明珠與之我本立大願普令一切衆亦同得此道無智者錯亂迷惑不信受是故於今日決定說大乘又云諸佛法久後

要當說真實真實者非生死非涅槃無邪無偏無倒無正咄哉丈夫示音繫珠咄哉去來寶處在近是故從本垂迹與法身眷屬隱實揚權藏高設下共化衆生開示正道內秘外現今開顯令得入妙正是此四念處也所言四者不可思議數一即無量無量即一一一皆是法界三諦具足攝一切法出法界外更無有法法界無法界具足法界雖無法具足諸法是不思議數也華嚴云一微塵中具一切塵及一切法於一念具一切念及一切法塵即

是色念即是心色心即念處異名耳大品云四念處即摩訶衍摩訶衍即四念處者於一念處與三念處無二無別一切法趣四念處是趣不過念處尚不可得云何當有趣不趣此亦不可思議意同也普賢觀云觀心無心法不住法名大懺悔名莊嚴懺悔觀心既然觀色亦爾大經云佛性者亦一非一非一非非一亦一者一切衆生悉一乘故非一者說三乘故非一非非一者數非數不決定故當知四數不可決定即不可思議之四也法華經中

八十聲聞得見佛性大經云為諸聲聞開發
慧眼天親以七種佛性釋法華當知二經佛
性理同同圓同妙同大更不異也而法華以
一乘為宗約智明法相涅槃以常為宗約定
明法相智定左右之異耳法華指前經亦云
以方便力故為五比丘說當文云正直捨方
便但說無上道涅槃開前經云為贖命故說
大涅槃明歷別五行十功德當文云復有一
行是如來行所謂大乘大般涅槃故知二經
是同今取究竟實說處即是圓極不可思議

四念處也釋數竟念者觀慧也大論云念想
智者一法異名初錄心名念次習行為想後
成辦名智處者境也元從不離薩婆若能觀
之智照而常寂名之為念所觀之境寂而常
照名之為處境寂智亦寂智照境亦照一相
無相無相一相即是實相實相即一實諦亦
名虛空佛性亦名大般涅槃如是境智無二
無異如如之境即如如之智智即是境說智
及智處皆名為般若亦例云說處及處智皆
名為所諦是非境之境而言為境非智之智

而名為智亦名心寂三昧亦名色寂三昧亦是明心三昧亦是明色三昧請觀音云身出大智光如燒紫金山大經云光明者即是智慧金光明云不可思議智境不可思議智照此諸經皆明念只是處處只是念色心不二法十不二而二為化衆生假名說二耳十七此之觀慧只觀衆生一念無明心此心即是法性為因緣所生即空即假即中一心三心三心一心此觀亦名一切種智此境亦名一圓諦一諦三諦三諦一諦諸佛為此一大事因緣出現

於世欲令衆生佛之知見開諸佛出世事足大經云王夷坦道無量義經云行大直道無留難故法華名具足道雖言三智其實一心為向人說今易解故而說為三若教道為言所斷煩惱如翻大地河海俱覆似崩大樹根枝悉倒用此智斷惑亦復如是通別塵沙無明一時清淨無量功德諸波羅密萬行法門具足無滅佛法秘藏悉現在前大品云諸法雖空一心具萬行大經云發心畢竟二不別法華云本末究竟等故名妙覺平等道當知

此慧即法界心靈之源三世諸佛無上法母以法常故諸佛亦常樂我淨等亦復如是亦名寶所亦名祕藏佛及一切之所同歸前三藏隘路不得並行通教共稟共行共入不能深別教紆迴歷別遙遠即不能達今此念處曠若虛空際於無際猶如直繩直入四海故名圓教四念處耳張衡曰翔鷲仰而不逮沈青鳥與黃雀當前三念處所不能及唯圓念處孤飛獨運凌摩絳霄無上無等無等等豎無高蓋故言無上橫無儔列故言無等無

等等於十方三世諸佛言無等等也欲重說此義更引天親唯識論唯是一識復有分別識無分別識分別識者是識識無分別者似塵識一切法界所有餅衣車乘等皆是無分別識成三無性無性名非安立諦如彼具說注十龍樹云四念處即摩訶衍摩訶衍即四念處一切法趣身念處即是一性色得有分別色無分別色分別色如言光明即是智慧也無分別色即是法界四大所成皆是無分別等是色心不二彼既得作兩識之名此亦作兩

色之說若色心相對離色無心離心無色若不得作此分別色無分別色云何得作分別識無分別識耶若圓說者亦得唯色唯聲唯香唯味唯觸唯識若合論一一法皆具足法界諸法等故般若等內照既等外化亦等即是四隨逐物情有難易大論曰一切法併空何須更用十論答空有二種一難解空二易解空十論是易解空今以易解空論難解空唯識意亦如是但約唯識具一切法門而衆生有兩種一多著外色少著內識二多著內

識少著外色如上界多著內識下二界著外色多內識少如學問人多向外解若約識爲唯識論者破外向內今觀明白十法界法皆是一識識空十法界空識假十法界假識中十法界亦中專以內心破一切法若外觀十法界即見內心法十當知若色若識十九皆是唯識若色若識皆是唯色今雖說色心兩名其實只一念無明法性十法界即是不可思議一心具一切因緣所生法一句名爲一念無明法性心若廣說四句成一偈即因緣所生心即

空即假即中故般若云受持一四句偈與十方虛空等法華云聞一偈亦與菩提記一句亦然三世亦如是今觀此只一心不可思議十界恒現前入心地法門故能不起寂滅現身八會只是一句一句有無量無量中只一句是爲不思議故如心諸佛然如佛衆生然是三無差別諸佛解脫當於一切衆生心中求衆生心亦當於諸佛解脫中求始是般若究竟等未了者一切法正一切法邪不以心分別即一切正心起想即癡無想即泥洹此

不思議非青黃赤白方圓長短無名無相究竟寂滅唯當心知口不能說若有因緣善方便用悉檀亦可得說以方便力爲比丘說衆生無量劫自性心不爲煩惱所染不染而染難可了知迷妄即染染即覆心不見淨性是

以久處生死不能返本還源源實難解二乘尚不聞其名何況凡夫今佛爲作習因如大通智所繫珠至釋迦時方成果實今此種子漸漸積習後遇聲光發此種子轉凡入聖漸漸積功德具足大悲心皆已成佛道若不爾

者無明覆法性出十法界五陰重迷積發若能超悟起二乘五陰乃至佛陰華嚴云心如工畫師造種種五陰一切世間中無不由心造諸陰只心作耳觀無明心畢竟無所有而能出十界諸陰此即不思議如法華云一念

法十

二十

夢行因得果在一念眠中無明心與法性合起無量煩惱尋此煩惱即得法性問別圓俱作此譬云何異答別則隔歷圓則一念具如芥子含須彌山故名不思議華嚴性起云一微塵中有大千經卷智人開塵出經是一念

無明心有煩惱法有智慧法煩惱是惡塵善塵無記塵開出法身般若解脫法華云如是性相等一界十界百千法界究竟皆等今觀此無明心從何而生為從無明為從法性為共為離若自若他四皆叵得名空解脫門只觀心性為有為無為共為離若常若斷四倒不可得名無相解脫門只此心性為真為緣為共為離非四句所作名無作解脫門無生而說生生十法界相性也無明性即是實性亦言無明即是明明亦不可得是為入不二

法門但衆生迷倒不見心之無心明成無明
云問衆生自性清淨不爲煩惱所染云何有
無明生答如前責生相不可得而作十四難
佛皆不答設答只長邪見大品中問有亦不
得道無亦不得道乃至四句俱不得道將非
世尊不得道耶佛答實得非四句耳金剛般
若云須菩提於是中無實無虛大論摩乾提
云瘞法應得道佛答汝若證我法是時自當
瘞佛有時知利益亦答十四難如答淨梵志
畢故不造新答我已知汝云何知無明名故

取有名新若知無明不起取有即知神及世
間常無常衆生只爲愛見迷於自性隨逐諸
妄緣輪不息去道甚遠五百由旬普賢觀云
爲息愛奴色使我眼法華云貪著生愛則爲
所燒諸苦所因貪欲爲本不斷煩惱而入涅
槃無明煩惱是如來種若斷煩惱即斷佛種
故言煩惱是道場斷煩惱不名涅槃不生煩
惱乃名涅槃煩惱即菩提生死即涅槃意在
修三種念處觀十界色名身十界受名受十
界識名心十界想行名法法性色一色一切

色一切色一色一受一切受一切受一受一
 心一切心一切心一心一想行法一切法一
 切法一法將智慧性觀十法界色性名為觀
 了達色中非垢非淨名為處智慧性觀十界
 受性名觀了達受中非苦非樂性名為處智
 慧性觀十界心性名為觀了達心性非常非
 無常性名為處智慧性觀十法界法性名為
 觀了達法性非我非無我名為處能所合標
 名性念處觀也次釋共念處觀觀十法界色
 非垢非淨雙照二諦垢之與淨其性無二無

二之性即是實性次觀十界受非苦非樂雙
 照二諦苦之與樂其性無二無二之性即是
 實性次觀十界心非常非無常雙照二諦常
 與無常其性無二無二之性即是實性次觀
 十界非常非無常雙照二諦常與無常其性
 無二無二之性即是實性次觀十法界非我
 非無我雙照二諦我與無我其性無二無二
 之性即是實性是名共念處觀次釋緣念處
 菩薩觀此身受心法無緣慈悲無緣無念如
 磁石吸鐵寂而常照雖無念不動而運大慈

普覆十界衆生衆生無量慈悲亦無量非一
廣大不可盡誓願非一廣大不可盡是名緣
念處三種一心具足觀此身受心法智慧性
名性念處一性念處一切性念處觀身受心
法定慧均和能助大道名共念處一
共念處一切共念處觀身受心法所有慈悲名緣念
處一緣念處一切緣念處觀此一念無明心
即是衆生衆生即法性法性即摩訶衍摩訶
衍即十法界性念處利益十法界衆生同於
四念處坐道場轉不思議種種法輪一切種

智以爲根本無量功德之所莊嚴皆令衆生
安置十地十種珍寶以爲脚足枯榮智慧以
爲雙樹若見佛性非榮非枯爲中間而般涅
槃雙照二諦總結四念處雖別說示人文言
難見只一刹那心即是因緣所生法因緣心
生滅即是三藏法十三十七品因緣心空是通三
十七品因緣心假是別三十七品因緣心中
非空非假即是圓三十七品只是一念心若
橫無際若豎無窮盡三諦源然此一念不橫
不豎若心即空即假即中是橫觀此心先見

空次見假後見中即是縱今諦觀心中三句
實不縱不橫不前不後畢竟清淨廣大法界
究竟虛空觀心實性無有微塵知覺即是法
名不覺不覺而覺名為佛具足恒沙法藏虛
空法門十方不可說不可說一微塵中法界
佛法僧究盡實相而無積聚譬如貧人多所
積聚乃名藏解脫不爾無所積聚無所積聚
即真解脫解脫即是如來無所積聚乃名虛
空能觀此藏是大千經卷聞此大藏是開佛
知見知見故五具具足五眼具足即成菩提

菩提即摩訶般若即得法身法身即真解脫
三點不縱不橫名大涅槃涅槃名諸佛法界
作是觀心是入如來室著如來衣坐如來座
舉足下足從道場來住於佛法矣如來遺囑
令於念處修道要在茲乎問前五停心六根
互用今念處證何功德答前說似解相貌如
上今修念處進發十住真位前觀海邊平相
曠蕩若斯況大海深廣渺渺浩浩可以智知
無俟更說

四念處卷第四

永樂北藏

四念處

第一六六册

音釋

鯁

古杏切
介礙也

罔

居永切
開明也

掠

力仗切
掠力杖擊也

麤

與職切

磁

音慈引
鐵石